

謝光祿集題詞

謝希逸爲殷淑儀哀文孝武流涕都
下傳寫及廢帝卽位則銜恨堯門幾
犯芒刃一文之出禍福懸途卽作者
詎能先覺乎明帝定亂命作赦詔酌
酒立成云子業事穢東陵行汗飛走

雖鍾鼓討伐之辭殆直自快胸懷矣
文章四百餘卷今僅存此封禪儀註
奏藻麗雲漢欲摹長卿搜才定刑二
表與索虜互市議雅人之章無忝國
器耳食者徒稱陳王之明月河南之
舞馬欲以兩賦槩其群長不幾采春
華忘秋實哉典任銓衡不干喧訴居
守禁門嚴待墨詔遂令顏暝讓清郅
章比節居風貌之中獲高明之福有
微子遺則焉左氏經傳分國立篇征
南以後當稱奇書竟滅不傳此余所
尤抱恨于謝巖也

婁東張溥題

謝光祿集目錄

賦

月賦

舞馬賦

赤鸚鵡賦

悅曲池賦

詔

宋明帝卽位赦詔

表

上摻才表

爲八座江夏王請封禪表

又

改定刑獄表

請弘風則表

太子元服上至尊表

太子元服上太后表

謝賜貂裘表

東海王讓司空表

讓中書令表

讓吏部尚書表

奏

上封禪儀註奏

封皇弟奏

改封長公主奏

章

爲北中郎謝兼司徒章

爲北中郎拜司徒章

啟事

與世祖啟事

牋

與大司馬江夏王義恭牋

書

爲朝士與袁顗書

帖

昨還帖

議

索虜互市議

贊

竹贊

哀策文

宋孝武帝哀策文

皇太子妃哀策文

宣貴妃謚冊文

誄

孝武宣貴妃誄

黃門侍郎劉琨之誄

墓誌銘

豫章長公主墓誌銘

司空何尚之墓銘

樂府

宋明堂歌九首

迎神歌

登歌

歌太祖文皇帝

歌青帝

歌赤帝

歌黃帝

歌白帝

歌黑帝

送神歌

宋世祖廟歌二首

世祖季武皇帝歌

宣太后歌

詩

烝齋應詔

和元日雪花應詔

七夕夜詠牛女應制

待宴蒜山

侍東耕

遊豫章西觀洪崖井

自潯陽至都集道里名爲詩

北宅祕園

喜雨

江都平解嚴

從駕頓上

八月侍華林曜靈殿八關齋

懷園引

山夜憂

聯句

華林都亭曲水聯句效栢梁體

附錄

本傳

謝光祿集目錄終

謝光祿集卷之全

宋陳郡謝 莊著

明太倉張 溥閱

賦

月賦

陳王初喪，應劉端憂多暇。綠苔生閣，芳塵凝榭。悄焉疚懷，弗怡中夜。乃清蘭路，肅桂苑。騰吹寒山，弭蓋秋坂。臨澹壑而怨遙，登崇岫而傷遠。于時斜澹左界，北陸南躔。白露曖空，素月流天。沈

吟齊童。殷勤陳篇。抽毫進牘。以命仲宣。仲宣跪而稱曰。臣東鄙幽介。長自丘樊。昧道慚學。孤奉明恩。臣聞沈潛既義。高明既經。日以陽德。月以陰靈。擅扶桑於東沼。嗣若英於西冥。引玄兔於帝臺。集素娥於后庭。朏朏警闕。朏朏示冲。順辰通燭。從星澤風。增華台室。揚彩軒宮。委照而吳業昌。淪精而漢道融。若夫氣霽地表。雲歛天末。洞庭始波。木葉微脫。菊散芳於山椒。鴈流哀於江瀨。升清質之悠悠。降澄暉之藹藹。列宿掩緜。

長河韜映。柔祇雪凝。圓靈水鏡。連觀霜縞。周除冰淨。君王乃厭晨歡。樂宵宴。收妙舞。弛清縣。去燭房。卽月殿。芳酒登。鳴琴薦。若乃涼夜自凄。風篁成韻。親懿莫從。羈孤逋進。聆臯禽之夕聞。聽朔管之秋引。於是絲桐練響。音容選和。徘徊房露。惆悵陽阿。聲林虛籟。淪池滅波。情紆軫。其何託。愬皓月而長歌。歌曰。美人邁兮音塵闕。隔千里兮共明月。臨風歎兮將焉歇。川路長兮不可越。歌響未終。餘景就畢。滿堂變容。迴遑如失。又

稱歌曰。月既沒兮露欲晞。歲方晏兮無與歸。佳
期可以還。微霜霑人衣。陳王曰善。乃命執事獻
壽薦璧。敬珮玉音。復之無斁。

舞馬賦

天子馭三光。總萬寓。挹雲經之留憲。裁河書之
遺矩。是以德澤上昭天。下漏泉。符瑞之慶咸屬
榮懷之應必躔。月晷呈祥。乾維效氣。賦景河房。
承靈天駟。陵原郊而漸影。躍采淵而沫質。辭水
穴而南徠。去輪臺而東暨。乘玉塞而歸寶。奄芝

庭而獻祕。及其養安。騏枝進駕。龍涓輝大馭於
國皂。賁上襄於帝閑。超益野而踰綠地。軼蘭池
而轢紫燕。五王晦其術。十氏憐其玄。東門豈或
狀。西河不能傳。既秣苞以均性。又佩蘅以崇躡。
卷雄神於綺文。蓄奔容於帷燭。蘊籥雲之銳景。
戢追電之逸足。方疊鎔於丹鎬。亦聯規於朱駮。
觀其雙璧應範。三封中圖。玄骨滿燕。室虛陽理。
竟潛策紆汗飛。赭沫流朱。至於肆夏已升。采齊
既薦。始徘徊而龍俛。終沃若而鸞盼。迎調露於

飛鍾赴承雲於驚箭，寫秦垌之彌塵，狀吳門之曳練，窮虞庭之蹈蹠，究遺野之環袷。若夫躡實之態未卷，凌遠之氣方攄，歷岱野而過碣石，跨滄流而軼姑餘，朝送日於西坂，夕歸風於北都。尋瓊宮於倏瞬，望銀臺於須臾。若乃日宣重光，德星昭衍，國稱梁岱，佇蹕史言，壇場望踐，鄙上之瑞彰，江間之禎闡，榮鏡之運旣臻，會昌之曆已辨，感五繇之程符，鑒群后之薦典，聖主將有事於東嶽，禮也。於是順斗極，乘次躔，戒懸日於

昭旦，命月題於上年，駢駢翼翼，泛修風而浮慶煙，肅肅雍雍，引八神而詔九仙，下齊郊而掩配林，集羸里而降祐田，蒲軒次獻，瑄璧承巒，金檢茲發，王牒斯刊，盛節之義洽，升中之禮殫，億兆悅，精祇歡，聆萬歲於曾岫，燭神光於紫壇，是以擊轅之蹈，撫埃之舞，相與而歌曰：聳朝蓋兮泛晨霞，靈之來兮雲漢華，山有壽兮松有茂，祚神極兮貺皇家，然後悟聖朝之績，號慶榮之烈，比盛乎天地，爭明乎日月，茂實冠於胥庭，鴻名邁

言元集 卷全 四
於勛發業底於告成道臻乎報謂巍巍乎蕩蕩
乎民無得而稱焉

赤鸚鵡賦

徒觀其柔儀所踐頽藻所挺華景夕映容光晦
鮮惠性昭和天機自曉審國音於寰中達方聲
於裔表及其雲移霞峙霰委雪翻陸離翬漸容
裔鴻軒躍林飛岫喚若輕電溢煙門集場棲圃
曄若天桃被玉園至於氣淳體潔霧下崖沈月
圖光於綠水雲寫影於青林迴還風而聳翮霑
清露而調音

悅曲池賦

北山兮黛柏南谿兮頽石頽岸兮若虹黛樹兮
如畫暮雲兮十里朝霞兮千尺步東池兮夜未
久卧西窻兮月向山引一息於菟內擾百緒於
眼前

詔

宋明帝卽位赦詔

高祖武皇帝德洞四瀛化綿九服太祖文皇帝
以大明定基世祖孝武皇帝以下武寧亂日月
所照梯山航海風雨所均削袵襲帶所以業固
盛漢聲溢隆周子業凶器自天忍悖成性人面
獸心見於齟日反道敗德著自比年其狎侮五
常怠棄三正矯誣上天毒流下國寔開闢所未
有書契所未聞再惟遏密而無一日之哀齊斬

在躬方深北里之樂虎兇難匣憑河必彰遂誅
滅上宰窮豐逆之酷虐害國輔究孥戮之刑子
鸞同生以昔憾殄殪敬猷兄弟以睚眦殲夷徵
逼義陽將加屠膾陵辱戚藩檟楚妃主奪立左
右竊子置儲肆醜于朝宣淫于國事穢東陵行
汙飛走積疊罔極日月滋深比遂圖犯玄宮志
窺題湊將肆梟獍之禍騁商頤之心又欲鳩毒
崇憲虐加諸父事均宮闈聲遍國都鴟梟小豎
莫不寵暱朝廷忠誠必加戮挫收掩之旨虓虎

結轍掠奪之使白刃相望百僚危氣首領無有
全地萬姓崩心妻子不復相保所以鬼哭山鳴
星鉤血降神器殆於馭索景祚危於綴旒朕假
寐凝憂泣血待旦慮大宋之基於焉而泯武文
之業將墜于淵賴七廟之靈藉八百之慶巨猾
斯殄鴻沴時褰皇綱絕而復紐天緯缺而更張
猥以寡薄屬承乾統上緝三光之重俯顧庶民
之艱業業矜矜若履冰谷思與億兆同此維新
可大赦天下改景和元年爲泰始元年賜民爵

二級鰥寡孤獨不能自存者，穀人五斛，逋租宿債，勿復收，犯鄉論清議，贓污淫盜，並悉洗除，長徒之身，特賜原遣，亡官失爵，禁錮舊勞，一依舊典，其昏制謬封，並皆刊削。

表

上按才表

臣聞功照千里，非特燭車之珍，德采隣國，豈徒祕璧之貴，故詩稱矜悴，誓述榮懷，用能道臻無積，化至恭已，伏惟陛下，膺慶集圖，締寓開縣，夕爽選政，晷旦調風，采言斯輿，觀謠仄遠，斯實辰階，告平頌聲，方製臣竊惟隆陂所漸，治亂之由，何嘗不興資得才，替因失士，故楚書以善人爲寶，虞典以則哲爲難，進選之軌，旣弛中代，登造

之律未闡當今必欲崇本康務庇民濟俗匪更
憇懣奚取九成升曆中陽英賢起於徐浦受錄
白水茂異出於荆宛寧二都智之所產士隩才
之所集實遇與不遇用與不用耳今大道光亨
萬務俟德而九服之曠九流之艱提鈞懸衡委
之選部一人之鑒易限而天下之才難原以易
限之鑒鏡難原之才使國罔遺授野無滯器其
可得乎昔公叔與僕同升管仲取臣於盜趙文
非親士踈嗣祁奚豈諂讐比子茹茅以彙作範

前經舉爾所知式昭往牒且自古任薦賞罰弘
明成子舉三哲而身致魏輔應侯任二士而已
捐秦相曰季稱冀缺而疇以田采張敦進陳湯
而坐以褫爵此先事之盛准亦後王之彝鑒如
臣愚見宜普命大臣各舉所知以付尚書依分
銓用若任得其才據主延賞有不稱職宜及其
坐重者免黜輕者左遷被舉之身加以禁錮年
數多少隨愆議制若犯大辟則任者刑論又政
平訟理莫先親民親民之要寔歸守宰故黃霸

治潁川累稔。杜畿居河東歷載。或就加恩秩。或入崇輝寵。今蒞民之職。自非公私。必應代換者。宜遵六年之制。進獲章明。庸愷退得。民不勤擾。如此則下無浮謬之愆。上靡棄能之累。考績之風。載泰。槽薪之歌。克昌。臣生屬亨路。身漸鴻猷。遂得奉詔左右。陳愚於側。敢露芻言。懼氛恒典。爲八座江夏王請封禪表

惟皇天崇稱大道。始行揖讓。迄于有晉。雖聿修前緒。而跡淪言廢。歲記於竹素者。焉可單書。紹

乾維建。徽號流風。聲被絲管。自無懷以來。可傳而不朽者。七十有四君。罔仁厚而道滅。鮮義澆而德宣。鍾律之先。曠世綿絕。難得而聞。丘索著明者。尙有遺炳。故易稱先天弗違。後天奉時。蓋陶唐姚姒。商姬之主。莫不由斯道也。是以風化大洽。光熙于後。炎漢二帝。亦踵曩則。因百姓之心。聽輿人之頌。龍駕帝服。鏤玉梁甫。昌言明稱。告成上靈。况大宋表祥。唐虞受終。素德山龍。啓符金玉。顯瑞異采。騰於軫墟。紫煙藹於邦甸。錫

晁兆九五之徵，文豹赴天曆之會，誠二祖之幽慶，聖后之冥休，道冠軒堯，惠深亭毒，而猶執冲約，未言封禪之事，四海竊以惡焉。臣聞惟皇配極，惟帝祀天，故能上稽乾式，照臨黔首，協和穹昊，膺茲多福。高祖武皇帝明並日月光，振八區，拯已溺之晉，濟橫流之世，撥亂寧民，應天受命，鴻徽洽于海表，威稜震乎沙外。太祖文皇帝體聖履仁，述業典禮，正樂頌作，象曆明達，通於神祇，玄澤被乎上下，仁孝命世，椒武英挺，遭運屯

否，三才湮滅，迺龍飛五洲，鳳翔九江，身先八百之期，斷出人鬼之表，慶煙應高牙之建，風耀符發迹之辰，親翦凶逆，躬清昏盞，天地革始，夫婦更造，豈與彼承業繼緒，拓復禹跡，車一其軌，書罔異文者，同年而議哉！今龍麟已至，鳳凰已儀，比李已實，靈茅已茂，雕氣降零於宮榭，珍露呈味於禁林，嘉禾積穗於殿甍，連理合幹於園禦，皆耀質離宮，植根蘭囿，至夫霜毫玄文，素翮頰羽，泉河山嶽之瑞，草木金石之祥，方畿憬塗之

謁抗驛絕祖之奏彪炳雜沓粵不可勝言太平之應茲焉富矣宜其從天人之誠遵先王之則備萬乘整法駕修封泰山塵玉岱趾延喬松於東序詔韓岐於西廂麾天閭使啓闕謁紫宮朝太一奏鈞天詠雲門贊揚幽奧超聲前古豈不盛哉伏願時命宗伯具茲典度

又

江淮鄙上之使結軌于璧門西鸚北采之譯相望於道路

○改定刑獄表

臣聞明慎用刑獄存姬典哀矜折獄實暉呂命罪疑從輕旣前王之格範寧失弗經亦列聖之恒訓用能化致升平道臻恭已逮漢文傷不辜之罰除相坐之令季宣倍深文之吏立鞠訊之法當是時也號令刑存陛下踐位親臨聽訟億兆相賀以爲無冤民矣而比囹圄未虛頌聲尚缺臣竊謂五聽之慈弗宣於宰物三宥之澤未洽於民謠頃年軍旅餘弊劫掠猶繁監司討獲

多非其實。或規免咎，不慮國患。楚對之下，鮮不誣濫。身遭鈇鑕之誅，家嬰孥戮之痛。比伍同閔，莫不及罪。是則一人罰謬，坐者數十。昔齊女告天，臨淄臺頌。孝婦冤戮，東海愆陽。此皆符變靈祇，初咸景緯。臣近兼訊，見重囚八人，旋觀其初。或有餘罪，詳察其理。實並無辜，恐此不少。誠可休惕也。舊官長竟囚畢，郡遣督郵案驗，仍就施刑。督郵賤吏，非能異於官長。有案驗之名，而無研究之實。愚謂此制宜革。自今人重之囚，縣考

正畢，以事言郡，并送囚身，委二千石親臨覈辯，必收聲吞釁。然後就戮。若二千石不能決，乃度廷尉。神州統外，移之刺史。刺史有疑，亦歸臺獄。必令歿者不怨，生者無恨。庶驚棺之諺，輟歎於終古。兩造之察，流詠於方今。臣學闇申韓，才寡治術，輕陳庸管，懼乖國憲。

請弘風則表

詔云：貴戚競利，興貨塵肆者，悉皆禁制。此實允
愿，民聽其中。若有犯違，則應依制裁糾。若廢法

申恩便爲令有所屈。此處分伏願深思無緣。明詔旣下而聲實乖爽。臣愚謂大臣在祿位者。尤不宜與民爭利。不審可得在此。詔不拔葵去織。實宜深宏。

太子元服上至尊表

伏惟皇太子殿下。明兩承乾。元良作貳。抗法迂身。英華自遠。樂以修中。禮以治外。三善克懋。德成教尊。今日昭辰。顯加元服。對靈祇之望。倚上庠之歡。率天罄世。莫不載躍。

太子元服上太后表

離景承宸。樞光陪極。毓問東華。飛英上序。樂正歌風。司成頌德。清明神鏡。溫文在躬。練日簡辰。顯被元服。懋三王之教。燭少陽之重。

謝賜貂裘表

臣莊言。主衣黃達。宣勅賜臣貂裘。匪發衽開。玄華有曜。靡毫柔毳。黠鑑自疑。固以綵越。綴翬光逾。緝鷲。臣聞。頤笑不妄。韓裳勿假。續有昭庸。楚纊爰建。臣歡忭自歌。而同委衾之澤。勤勞未報。

而叨解裘之寵。空荷榮施。徒賁微軀。承殊恩必識服以淪生。銘悅之情。罔知所寘。臣受假無由。躬拜謹遣表。

東海王讓司空表

臣側觀前載。與窺洪典。三事之授。惟帝其難。臣乘少籍。長久。分踰涯量。出滿入泰。每究榮光。不悟乾燭方遠。義路同遺。下參弘化。上尸燮理。自非德仞具瞻。聲堪民詠。未有妄臻此澤。空集

讓中書令表

茲靈

伏惟陛下登取震維。臨齊璿政。澤與風翔。恩從雲動。臣聞璧門天邃。鳳沼神深。絲綸王言。出納帝命。自非望允當時。誓宣庠塾。未有謬垂曲寵。空席茲榮。在於平壯。猶不可勉。况今綿癘。百志俱淪。

○讓吏部尚書表

招才琴釣之上。取士歌牧之中。終能克夷景命。榮懷萬宇。豈容先絃首曲。近有經過。且不習冠制。趙客興鑒。未聞統馭。鄭臣有規。匪疴身譏。

奏

○上封禪儀註奏

臣聞崇號建極，必觀俗以樹教，正位居體，必採世以立言，是以重代列聖，咸由厥道，玄勳上烈，融章未分，鳴光委緒，歇而罔藏，若其顯謚騰軌，則系綴聲采，徵畧聞聽，爰洎姬漢，風流尚存，遺芬餘榮，綿映紀緯，雖年絕世祀，代革精華，可得騰金綵，奏玉潤，鏤迹以燠今，鑄德以麗遠，而四望埋禋歌之禮，日觀弛修封之容，豈非神明之

業難崇功基之迹易泯自茲以降訖于季末莫
不欲英弘徽位詳固洪聲豈徒深默修文淵幽
馭世而已諒以際非虛奏書匪妄埋擊雨恕神
淳廕復樹安得紫壇肅祇竹宮載竚散火投郊
流星奔座寶緯初基厭靈命曆德振弛維功濟
淪象玄浸紛流華液幽潤規存永馭思詳樹遠
太祖文皇帝以啓邁泰運景望震凝永樂調風
集禮宣度祖宗相映軌迹重暉聖上韞籙蕃河
竚翔衡漢金波掩照華耀停明運動時來躍飛

風舉澄氛海岱開景中區歇神還靈顏天重耀
儲正凝位於兼明袞嶽蕃華於元列故以祥映
昌基繫發篆素重以班朝待典飾令詳儀纂綜
淪蕪揆騰委逸奏玉郊宮禮珪玄峙景集天廟
脉壤祥農節至昕陽川丘夙禮網威巡駟表綏
中甸史流其誅民挹其風於是涵迹視陰振聲
威響歷代之渠沈望內安侯之長賢王入侍
殊生詭氣奉俗還鄉羽族卉儀懷音革狀邊帛
絕書權光弛燭天岱發靈宗河開寶崇丘淪鼎

振采泗淵。雲皇王嶽。摛藻漢并角。卽音栖翔。禁禦袞甲霜味。翺舞川肆。榮泉流鏡。後昭河源。故以波沸外關。雲蒸內澤。若其雪趾青毳。玄文朱綵。日月郊甸。擇木弄音。重以榮露騰軒。蕭雲掩閣。鎬穎孳萌。移華淵禁。山輿竚衡。雲鷲竦翼。海鰈泳流。江茅吐蔭。校書之列。仰筆以飾辭。濟代之蕃。獻邑以待禮。豈非禮勰氣昌。物瑞雲照。蒲軒龜軫。泉淳芳太宰。江夏王臣義恭。咀道遵英。栖奇麗古。該潤圖史。施詳閔載。表以功懋。

往初德耀炎昊。升文中岱。登牒天關。耀冠榮名。摛振聲號。而道謙稱首。禮以虛挹。將使玄祇缺。觀幽瑞垂期。梁甫無盛德之容。介丘靡升聞之響。加窮泉之野。獻八代之駟。交木之鄉。奠絕金之楛。肅靈重表。珍符兼贖。伏惟陛下。謨詳淵載。衍屬休章。依徵聖靈。潤色聲業。諏辰稽古。肅齊警列。儒僚展采。禮官相儀。懸筵動音。洪鍾竦節。陽路整衛。正途清禁。於是績環珮。端玉藻。鳴鳳竚律。騰駕流文。閒綵比象之容。昭明紀數之服。

徽焯天陣容藻神行翠蓋懷陰羽華列照乃詔
聯事掌祭賓客贊儀金支宿縣鑄石潤響命五
神以相列闢九關以集靈驚衛兵而開雲先雨
祇以灑路霞凝生闕煙起成宮臺冠丹光壇浮
素靄爾乃臨中壇備盛禮天降祥錫壽固皇根
谷動神音山傳稱響然後辨年問老陳詩觀俗
歸薦告神奉遺清廟光美之盛彰乎萬古淵祥
之烈溢乎無窮豈不盛歟臣等生接昌辰肅懋
明世束教管聞未足言道且章志湮微代徃淪

絕抱採遺文辯明訓誥

遙訪鄒魯草騰

書堙玉之禮具竦石繩金之儀和芝潤瑛鐫璽
乾封懼弗軌屬上徽輝當王則謹奉儀注以聞

封皇弟奏

臣聞桐圭睦親書河汾之策賜帶懷賢敬東平
之祚諒以訓經終始義洽垣墉第某皇弟等器
彩明敏令識穎悟並宜憲章前典光啓祚宇作
屏王室式雍帝載臣等參議可封郡王

改封郡長公主奏

臣聞爵厚懿戚國之恒典景祚既新禮與時渥
永興等七公主可封郡長公主

章

為北中郎謝兼司徒章

臣聞燮理陰陽寅亮天地弗惟其官無人則闕
司徒掌敷五教職授兆民豈悟乾靈罔匱光渥
方闡不次之任殊絕藩岳豈可權尸三事假備
六符慙震周迴顧步交慙

為北中郎拜司徒章

不為震施罔匱鴻慶方稠燮調之重遂臻非據
智小謀大周易興規少陽微暄有鑒前史辨其

動植布其安擾以倡九牧阜成王教豈臣耿未
所能克荷

啓事

與世祖啓事

賊劬自絕於天裂冠毀冕窮弑極逆開闢未聞
四海泣血幽明同憤奉三月二十七日檄聖迹
昭然伏讀感慶天祚王室叡哲重光殿下文明
在嶽神武居陝肅將乾威龔行天罰滌社稷之
仇雪華夷之恥使弛墜之構更獲締造垢辱之
厖復得明目伏承所命柳元景司馬文恭宗慤
沈慶之等精甲十萬已次近道殿下親董銳旅

授律繼進，荆鄢之師，岷漢之衆，舳艫萬里，旌旆
虧天，九土冥符，群后畢會，今獨夫醜類，曾不盈
旅，自相暴殄，省闈橫流，百僚屏氣，道路以目，檄
至輒布之京邑，朝野同欣，里頌塗歌，室家相慶，
莫不望景聳竄，瞻雲佇足，先帝以日月之光，照
臨區寓，風澤所漸，無幽不洽，況下官世荷寵靈，
叨恩踰量，謝病私門，幸免虎口，雖志在投報，其
路無由，今大軍近次，永清無遠，欣悲踴躍，不知
所裁。

牋

○與大司馬江夏王義恭牋

下官凡人，非有達槩異識俗外之志，實因羸疾，
常恐奄忽，故少來無意於人間，豈當有心於崇
達邪，頃年乘事回薄，遂果饗非次，既足貽誦明
時，又亦取愧朋友，前以聖道初開，未遑引退，及
此諸夏事寧，方陳微請，欸志未伸，仍荷今授，被
恩之始，具披寸心，非惟在已，知尤實懼塵穢，彝
序稟生多病，天下所悉，兩臂癱疾，殆與生俱。一

月發動不減兩三。每至一惡痛來逼心。氣餘如
縊。利患數年。遂成痼疾。吸吸憒憒。常如行尸。恒
居歿病。而不復道者。豈是疾痊。直以荷恩深重。
思答殊施。牽課疋瘵。以綜所忝。眼患五月來。便
不復得夜坐。恒閉帷避風日。晝夜惛懵。爲此不
復得朝謁諸王。慶弔親舊。唯被勅見。不容停耳。
此段不堪見賓。已數十日。持此苦生。而使銓綜
九流。應對無方之訴。實由聖慈罔已。然當之信
自苦劇。若才堪專任。而體氣休健。承寵異之遇。

處自效之塗。豈苟欲思閒辭事邪。家素貧弊。宅
舍未立。兒息不免麤糲。而安之若命。寧復是能
忘微祿。正以復有切於此處。故無復他願耳。今
之所希。唯在小閑下官微命。於天下至輕。在已
不能不重。屢經披請。未蒙哀恕。良由誠淺辭訥。
不足上感。家世無年。亡高祖四十。曾祖三十二。
亡祖四十七。下官新歲。便三十五。加以疾患如
此。當復幾時。見聖世就其中。煎懷若此。實在可
矜。前時曾啓願三吳。勅旨云。都不須復議外出。

莫非過恩，然亦是下官生運，不應見一間逸。今不敢復言此，當付之來生耳。但得保餘年，無復物務，少得養病，此便是志願未畢。在衡門下，有所懷，動止必聞，亦無假居職。患於不能禪補，萬一耳識淺才常，羸疾如此，孤負主上擢授之恩，私心實自哀愧。入年便當更申前請，以歿自固。但庸近所訴，恐未能仰徹，公恩眄弘深粗，照誠懇願，侍坐言次，賜垂拯助，則苦誠至心，庶獲哀允。若不蒙降祐，下官當於何希冀邪。

仰憑慈察願不垂悵

書

爲朝士與袁顛書

夫夷、陂相因，興革遞數，或多難而固其國，或殷憂而啓聖明。此旣著於前史，亦彰於聞見。王室不造，昏凶肆虐，神鼎將淪，宗稷幾泯。幸天未亡，宋乾曆有歸，主上體自聖文，繼明作睿，而辱均牖，里屯踰夏臺。旣天地俱憤，義勇同奮，尅殄鯨鯢，三靈更造，應天順民，爰集寶命。四海屬息肩之歡，華戎見來蘇之泰。吾等獲免刀鋸，僅全首

領復身奉惟新命承亨運緩帶談笑擊壤聖世
汝雖劬勞于外跡阻京師然心期所寄江漢何
遠自九江告變皆謂鄧氏狂惑比日國言籍籍
頗塵吾子道路之議豈其或然聞此之日能無
駭惋凶人反道敗德日夜滋深昵近狡慝取謀
豺虎非惟毒流外物惡積中朝乃欲毀陵邑虐
崇憲燒宗廟鹵御物然後蕩覆京都必使蘭猶
俱盡自非聖上廟筭靈圖俛眉遜避維持內外
擁衛臣下則赤縣爲我百姓其魚矣此事此理

寧可孰念旣天道輔順謳歌有奉高祖之孫文
皇之子德洞九幽功貫三曜匡拯家國提毓黔
首若不子民南面將使神器何歸而羣下構慝
妄生窺覲成軫惑燕貫高亂趙讒人罔極自古
有之汝中京冠冕儒雅世襲多見前載縣鑒忠
邪何遠遺郎中之清軌近忘太尉之純槩相與
或羣從舅甥或姻婭周款一旦胡越能無悵悵
若疑誑所至邪說無窮汝當誓衆奮戈翦此朝
食若自延過聽迷塗未遠聖上臨物以仁接下

謝光祿集 卷全
以愛豈直雍齒先封。乃當射鈎見相矣。當由力
窘跡屈。丹誠未亮。邪。跂予南服。寤寐延首。若反
棹。泐流歸誠。鳳闕錫圭。開寓非爾。而誰吾等。竝
過荷曲。慈俱叨非服。紆金拖王。改觀蓬門。入奉
舜禹之渥。出見羲唐之化。雍容揄揚。信白駒空
谷之時也。柰何毀擲。先基自蹈。凶戾山門。蕭瑟
松庭。誰掃言念。楚路豈不思父母之邦。幸納惡
后。以蠲美疾。裁書表意。爾其圖之。

帖

昨還帖

弟昨還。方承一日。忽患悶。當時乃爾大惡。殊不
易追企。恒想諸治。昨來已漸勝。眠食復云何。頃
日寒重。春節至。居患者無不增動。今作何治。眼
風不異耳。指遣承問。謝莊白呈左僕射。

議

○索虜互市議

臣愚以爲。無儉棄義。唯利是視。關市之請。或以
覘國順之示弱。無明柔遠。拒而觀釁。有足表疆
且漢文和親。豈止彭陽之寇。武帝修約。不廢馬
邑之謀。故有餘則經畧。不足則閉關。何爲屈冠
帶之邦。通引弓之俗。樹無益之軌。招塵點之風。
交易爽議。旣應深杜。和約詭論。尤宜固絕。臣庸
管多蔽。豈識國儀。恩誘降逮。敢不披盡。

贊

竹贊

瞻彼中唐，綠竹猗猗，貞而不介，弱而不虧，杳裊
人圃，蕭瑟雲崖，推名楚潭，美質梁池。

哀策文

宋季武帝哀策文

應門洞望、馳道南除、叢塗已撤、鬱壘將虛、哀子
嗣皇帝、擗標池、綽周遑、旌軫攀七緯之崩、淪慟
三靈之徂盡、百神慕而行雲沉、萬國哀而素霜
賁、衣冠緬邈、弓劔不追、敢緝謳頌、髮髯希夷、其
辭曰、

樞電皇根、月瑤國緒、胤裔丹陵、蟬聯華渚、二后
在天、大行纂武、克睿克聖、重規襲矩、昭昭金式、

明明玉溫、望雲其遠、就日其尊、雨零露湛、冬暖
春暄、聲芳納麓、道昭賓門、上德無稱、至功不器、
昭悵四始、優遊六位、綴響蘭深、緝言瓊秘、悠哉
梁踐、眇焉汾肆、敬業開寓、離經作翰、鴻起荆河、
鸞遊楚漢、泗濱霑明、江區承負、陝左清郊、棠陰
虛館、地維不紐、乾綱弛機、義庭薄蝕、紫路流飛、
泣血派浹、顧瞻川沂、孝貫樞極、義震寰圍、誓鉞
皇郊、詔師牧甸、七景締華、五雲卷煽、雪怨園邑、
掃恥瀛縣、啓聖宸蓋、集寶龍見、王室多故、國步

方蹇、淮濟裂冠、江荆毀冕、東楚亂常、西華啓釁、
動筭揮圖、爰戡爰剪、浹宙斯澄、綿區咸鏡、修風
曉逸、德星夕映、溽露飛甘、舒雲結慶、禎被動植、
信泊翔泳、缺禮克宣、隆章必構、方堂饗極、圓流
肆胄、南聳郊宮、北清靈囿、瑤軒春藉、翠華冬狩、
經緯窮文、克定盡武、鄙上呈祥、介丘載佇、在盈
念冗、成功弗處、榮鏡中世、舄奕前古、睿業初遠、
鴻化方亭、丹雲承日、素景騰星、玉几去襲、綴衣
在庭、辭重陽之昭昭、降大夜之冥冥、氣買炎涼、

史詔龜筮、文物空嚴、鑿和虛衛、動蜃輅之逶迤、
顧璧羽之容裔、出國文而分天地、向幽途而異
身世、龍旌鬱而青槐遠、驚葭亂而白楊翳、觀初
霜之變條、聽秋風之下蒂、橋山絙雲、穀林虧日、
輦道結寒、松庭盡密、芝蓋迫軫、上驥眷轡、萬寓
肅其北較、靈阿聞其深隘、南維有時傾、離光不
常鏡、騰英聲與茂實、方流華於舞詠、

皇太子妃哀策文

楹凝桂酒、庭肅龍輶、風吹國輅、雲起郊門、皇帝

傷總繼之掩綵、悼副禕之滅華、行光旣宴、長河
又斜、顧而言曰、璇璫有毀、郁烈無湮、翦素裁簡、
授之史臣、其辭曰、

霍岫虧天、濤流凝漢、祥發桐珪、慶昭金筭、毓景
帝里、飛芳戚閑、秘儀施谷、升音集灌、月晷幾望、
娣袂維良、釋幃春宮、承飾少陽、五葉衍藻、四訓
抽光、歲蕤蕙振、婉變瓊相、清徽就遠、稜沴方搏、
臨華罷翠、當曄收蘭、復鍛生響、長廡結寒、節移
虛饋、氣變容衣、中庭草暖、階上螢飛、傷縈里第、

痛溢朝闈，霜侵燭昧，風密帷淒，驚葭夕轉，龍驂
夜嘶，遙旣談兮奠旣徹，背青闕兮去神閨，旌掩
鬱而還泛，蓋透遲而顧低，素紉斂維，華輶解馭，
山燧恒陰，松阿不曙，離天渥兮就銷沈，委白日
今卽冥暮，菊有秀兮蘅有芬，德方遠兮聲彌樹，

宣貴妃謚冊文

維年月日，皇帝曰咨故淑儀殷氏，惟爾含徽挺
茂，爰光素里，友琴流荇，實華紫掖，奉軒景以柔
明，登譽處椒風以婉變，升名幽閑之範，日藹層
闈，繁祉之慶，方崇蕃世，而當春掩藻，中波滅源，
朕用震悼，傷于厥心，松區已翦，泉冥將墜，宜有
旌德第行，式衍聲芳，今遺某官集冊，告謚曰宜
寬而有靈，尚茲寵渥，嗚呼哀哉。

誄

李武宣貴妃誄

惟大明六年夏四月壬子宣貴妃薨律谷罷煖
龍鄉輟曉照車去魏連城辭趙皇帝痛掖殿之
旣聞悼泉途之已宮巡步檐而臨蕙路集重陽
而望椒風嗚呼哀哉天寵方隆王姬下姻肅雍
揆景陟岵爰臻國軫喪淑之傷家凝實妣之怨
敢撰德於旂旒庶圖芳於鐘萬其辭曰

玄丘煙煜瑤臺降芬高唐淅雨巫山鬱雲誕發

蘭儀光啓玉度，望月方娥，瞻星比婺，毓德素里。
棲景宸軒，處麗締綌，出懋蘋蘩，修詩賁道，稱圖
照言，翼訓如幄，贊軌堯門，綢繆史館，容與經闈。
陳風緝藻，臨彖分微，游藝碑數，撫律窮機，躊躇
冬愛，怊悵秋暉，展如之華，實邦之媛，敬懃顯揚。
肅恭崇憲，奉榮維約，承慈以遜，逮下延和，臨朋
違怨，祚靈集祉，慶藹迎祥，皇胤璿式，帝女金相。
聯跗齊楨，接萼均芳，以藩以牧，燭代輝梁，眠朔
書氛，觀臺告祲，八頌扇和，六祈輟滲，珩琕減容，

華翟毀衽，掩綵瑤光，收華紫禁，嗚呼哀哉，帷軒
夕改，輶輅晨遷，離宮天邃，別殿雲懸，靈衣虛襲，
組帳空煙，巾見餘軸，匣有遺絃，嗚呼哀哉，移氣
朔兮變羅紈，白露凝兮歲將闌，庭樹驚兮中帷
響，金釭暖兮玉座寒，純孝擗其俱毀，共氣摧其
同欒，仰昊天之日莫報，怨凱風之徒攀，茫昧與善，
寂寥餘慶，喪過于哀，棘實滅性，世覆中華，國虛
淵，令嗚呼哀哉，題湊旣肅，龜筮旣辰，階撤兩奠，
庭引雙輜，維慕維愛，曰子曰身，慟皇情於容物，

崩列辟於上旻、崇徽章而出寰甸、照殊策而去
城闈、嗚呼哀哉、經建春而右轉、循閭闔而徑渡、
旌委鬱於飛飛、龍逶遲於步步、鏘楚挽於槐風、
遏邊簫於松霧、涉姑射而環迴、望樂池而顧慕、
嗚呼哀哉、晨輶解鳳曉、蓋俄金山庭寢日、隧路
抽陰、重扃閉兮燈已黯、中泉寂兮此夜深、銷神
躬於壤末、散靈鳧於天漭、響乘氣兮蘭馭、風德
有遠兮聲無窮、嗚呼哀哉

黃門侍郎劉琨之誄

秋風散兮涼葉稀、出吳洲兮謝江畿、瞻國門兮
聳雲路、睇舊里兮驚客衣、魂終朝而三奪、心一
夜而九飛、過建春兮背闕庭、歷承明兮去城輦、
旌徘徊而北係、轡逶遲而不轉、挽掩隧而辛嘶、
驥含愁而鳴俛、顧物色之共傷、見車徒之相泣、

墓誌銘

豫章長公主墓誌銘

稟中樞之照、體星軒之華、肅恭在國、掖庭欽其
風、恪勤衡館、庶族仰其德、

神葉靈條、爰自帝堯、文信啓魯、肇京于楚、宵燭
載照、娥英是從、婉婉締綌、優柔肅雍、蘅蕙有寶、
金碧不居、泉庭一夜、里館長蕪、

司空何尚之墓銘

遠源長瀾、自晉徂韓、潛川韜玉、霍岫騰鑿、處華

謠九神集 卷全
民瞻出光帝難寂寞壽仁茫昧報施調於飢歸
經難褰寄晻映流芳煙煜作義

樂府

宋明堂歌九首

通典曰建元元年使謝莊造郊廟舞樂
明堂諸樂歌詩南齊書樂志曰明堂辭
五帝漢郊祀歌皆四言宋孝武使謝莊
造辭莊依五行數本數用三火數用七
土數用五金數用九水數用六周頌我
將祀文王言皆四共一句五一句七莊
歌太祖亦無定句

迎神歌

地紐謐乾樞回華蓋動紫微開旌蔽日車若雲
駕六龍乘網緼曄帝京輝天邑聖祖降五靈集

構瑤祀聳珠簾，漢拂幌，月棲檐，舞綴暢，鍾石融。
駐飛景，鬱行風，懋粢盛，潔牲牲，百禮肅，群司虔。
皇德遠，大孝昌，貫九幽，洞三光，神之安，解玉鑾。
景福至，萬寓歡。

登歌

雍臺辨朔，澤宮練辰。一作潔火夕照。明水朝陳，
六瑚貢室，八羽華庭。昭事先聖，懷濡上靈。肆夏
戒敬，升歌發德，永固鴻基，以綏萬國。

歌太祖文皇帝

維天爲大，維聖祖是則。辰居萬寓，綴旒下國。內
靈八輔，外光四瀛。蒿宮仰蓋，日館希旌。複殿留
景，重檐結風。刮楹接緯，達響承虹。設業設虞，在
王庭肇禋祀，克配乎靈。我將我享，維孟之春。以
孝以敬，以立我蒸民。

歌青帝

參映夕駟，照晨靈乘。震司青春，鴈將向，桐始糝。
柔風舞暄光，遲萌動達。萬品新潤，無際澤無垠。

歌赤帝

龍精初見大火中朱光北至圭景同帝在在離
寔司衡水雨方降木槿榮庶物盛長咸殷阜恩
覃四冥被九有

歌黃帝

履建

宋書作良

宅中寓司繩御

宋作總

四方裁化遍寒

燠布政周炎涼景麗條可結霜明冰可折凱風

扇朱辰白雲流素節分至乘結

宋作涇

晷啓閉集

恒度帝運緝萬有皇靈澄國步

歌白帝

百川如鏡天地爽且明雲冲氣舉德盛在素精
木葉初下洞庭始揚波夜光徹地翻霜照懸河
庶類收成歲功行欲寧浹地奉渥罄宇承秋
宋作帝靈

歌黑帝

歲月旣晏方馳靈乘坎德司規玄雲合晦鳥
歸路白雲一作雪繁亘天涯雷在地時未光飾國
典閉關梁四節遍萬物殿福九域祚八鄉晨晷
促夕漏延太陰極微陽宣鵲將巢冰已解氣濡

謨光祿集 卷全
水、風動泉

送神歌

蘊禮容、餘樂度、靈方留、景欲暮、開九重、肅五達、
鳳參差、龍已沫、雲旣動、河旣梁、萬里照、四空香、
神之車、歸清都、璇庭寂、玉殿虛、濬化凝、孝風熾、
顧靈心、結皇思、

宋世祖廟歌二首

世祖孝武皇帝歌

帝錫二祖、長世多祐、於穆睿考、龔聖承矩、玄極

弛馭、乾紐墜緒、闢我皇維、締我宗

宋一作

宇、刷定

四海、肇構神京、復禮輯樂、散馬墮城、澤物九有、
化浮八瀛、慶雲承掖、甘露飛甍、肅肅清廟、徽徽
闕宮、舞蹈象德、笙磬陳風、黍稷非盛、明德惟崇、
神其歆止、降福無窮、

宣太后歌

稟祥月輝、毓德軒光、嗣徽媯汭、思媚周姜、母臨
萬寓、訓藹紫房、朱玄玉籥、式載瓊芳、

詩

烝齋應詔

以下
五言

霜露凝宸感，肅儉動天引。
 西郊滅湮揜，一作東
 溟起昭晉舞，風泛龍常輪。
 霞浮玉輶紫，階協笙鏞金。
 途展應棟方，見六詩和。
 永聞九德潤，觀生識幸渥。
 睇服慙輶，一作悒

和元日雪花應詔

從候昭神世，息燧應頌道。
 玄化盡天秘，凝功畢地寶。
 笙鏞流七始，玉息承三造。
 委霰下璇蕤，疊

雪翻瓊藻積曙境寓明聯萼千里杲掩映順雲
懸搖裔從風掃發貺燭任前騰瑞光圖表澤厚
見身末恩踰悟生眇竦誠岱駕肅側志梁鑿矯

七夕夜詠牛女應制

輟機起春暮停箱動秋衿璇居照漢右芝駕肅
河陰容裔泛星道逶迤濟煙潯陸離迎宵佩條
爍望昏簪俱傾環氣怨共歇浹年心珠殿釭未
沫瑶庭路已深夕清豈淹拂弦輝無久臨

侍宴蒜山

龍旌拂紆景鳳蓋起流雲轉蕙方因委層華正
氛氲煙竟山郊遠霧罷江天分調石飛延露栽
金起承雲

侍東耕

肅鑣奉晨發恭帶厠朝聞仙鄉降朱靄神郊起
青雲陰臺承寒彩陽樹迎初熏觀德欣臨藉瞻
道樂遊汾

遊豫章西觀洪崖井

幽願平生積野好歲月彌捨簪神區外整褐靈

鄉垂林遠炎天隔山深白日虧游陰騰鵠嶺飛
清起鳳池隱曖松霞被容與澗煙移將遂丘中
性結駕終在斯

自潯陽至都集道里名爲詩

山經亟旋覽水牒勑敷尋稽榭誠淹留煙臺信
遐臨翔州凝寒氣秋浦結清陰眇眇高湖曠遙
遙南陵深青溪如委黛黃沙似舒金觀道雷池
側訪德茅堂陰魯顯闕微迹秦良滅芳音訊遠
博望崖採賦梁山岑崇館非陳宇茂苑豈舊林

北宅祕園

夕天霽晚氣輕霞澄暮陰微風清幽幌餘日照
青林收光漸牕歇窮園自荒深綠池翻素景秋
槐響寒音伊人儻同愛絃酒共棲尋

喜雨

燕起知風舞礎潤識雲流冽泉承夜湛零雨望
晨浮合穎行盛茂分穗方盈疇

江都平解嚴

肅旗簡廟律聳鉞暢乾靈朝晏推物泰通渥抃

謝光祿集 卷全
身寧擊轅歌至世撫壤頌惟馨

從駕頓上

申權臨楚路，前茅望吳雲。冀馬依風蹠，邊簫當夜聞。

八月侍華林曜靈殿八關齋

玉桴乘夕遠，金枝終夜舒。澄淳玄化闡，希微寂理孚。

懷園引

以下雜言

鴻飛從萬里，飛飛河岱起。辛勤越霜霧，聯翩遡

江汜，去舊國，違舊鄉，舊海悠且長，迴首瞻東路，延翻向秋方，登楚都，入楚關，楚地蕭瑟楚山寒，歲去冰未已，春來鴈不還，風蕭幌兮露濡庭，漢水初綠柳葉青，朱光藹藹雲英英，離禽啾啾又晨鳴，菊有秀兮松有蕤，憂來年去容髮衰，流陰逝景不可追，臨堂危坐悵欲悲，試託意兮向芳蓀，心綿綿兮屬荒樊，想綠蘋兮旣月沼，念幽蘭兮已盈園，天桃晨暮發，春鶯旦夕喧，青苔蕪石路，宿草塵蓬門。

山夜憂

庭光盡山明歸流風乘軒卷明月緣河飛澗鳥
 鳴今夜蟬清橘露靡兮蕙煙輕凌別浦兮值泉
 躍經喬木兮遇猿驚南臯別鶴行佇漢東隣孤
 管入青天沈疴白髮共急日朝露過隙詎賒年
 年既去兮髮不還金膏玉液豈留顏迴於拓繩
 戶收棹掩荆關

聯句

華林都亭曲水聯句效栢梁體

九宮盛事予旒纁

宋孝武帝

三輔務根識難亮

揚州刺史

江夏王

策拙粉鄉慙恩望

南徐州刺史

折衝莫

效與民謗

領軍將軍

侍禁衛儲恩踰量

太子右

臣謬叨寵九流曠

吏部尚書

喉唇廢職方恩讓

侍中

臣明筆直繩天威諒

御史中丞

本傳

謝莊字希逸，陳郡陽夏人。太常弘微子也。年七歲，能屬文。通論語及長，詔令義容儀。太祖見而異之，謂尚書僕射殷景仁領軍將軍劉湛曰：「藍田出玉，豈虛也哉！」初爲始興王濬後軍法曹行參軍，轉太子舍人。廬陵王文學太子洗馬中舍人。廬陵王紹南中郎諮議參軍，又轉隨王誕後軍諮議，並領記室。分左氏經傳，隨國立篇製木方丈圖山川土地，各有分理。離之則州別郡殊。

合之則寓內爲一元嘉二十七年索虜寇彭城虜遣尚書李季伯來使與鎮軍長史張暢共語季伯訪問莊及王徽其名聲遠布如此二十九年除太子中庶子時南平王鑠獻赤鸚鵡普詔羣臣爲賦太子左衛率袁淑文冠當時作賦畢齎以示莊莊賦亦竟淑見而歎曰江東無我卿當獨秀我若無卿亦一時之傑也遂隱其賦元凶弑立轉司徒左長史世祖入討密送檄書與莊令加改治莊遣腹心奉啟事密詣世祖世祖

踐阼除侍中索虜求通互市莊議應固絕時竟陵王誕當爲荊州徵丞相荊州刺史南郡王義宣入輔義宣固辭不入而誕克日下船莊以丞相既無入志驃騎發便有期於事不便世祖乃申誕發日義宣竟不下上始踐阼下節儉詔書莊慮此制不行時以爲言季建元年遷左衛將軍初世祖嘗賜莊寶劍莊以與豫州刺史魯爽送別爽後反叛世祖因宴集問劍所在答曰昔與魯爽別竊爲陛下杜郵之賜上說當時以爲

知言時揆才路陘。莊表請普命大臣各舉所知。有詔。莊表如此。可付外詳議。事不行。其年拜吏部尚書。莊素多疾。不願居選部。與大司馬江夏王義恭牋自陳。三年。坐辭疾。多免官。大明元年。起爲都官尚書。奏改定刑獄。上時親覽朝政。以吏部尚書選舉所由。欲輕其勢力。下詔曰。八柄馭下。以爵爲先。九德咸事。政典居首。銓衡治樞。典替攸寄。頃世以來。轉失厥序。徒秉國鈞。終貽權謗。今南北多士。勲勤彌積。物情善否。實繫斯

任官人之詠。維聖克允。則哲之美。粵帝所難加。澆季在俗。讓議成風。以一人之識。當群品之誦。望沈浮自得。庸可致乎。吏部尚書。可依郎分置。并詳省闕曹。又別詔太宰江夏王義恭曰。分選詔旦出。在朝論者。亦有同異。誠知循常甚易。改舊生疑。但吏部尚書由來與錄共選。良以一人之識。不辨洽通。兼與奪威權。不宜專一。故也。前迹宜先旨。敬從來奏。省錄作則。永貽後昆。自此選舉之要。唯由元凱一人。若通塞乖衷。而訴達

者。尠且違令與物理。至隔闕。前王盛主。猶或難之。況在寡闇。尤見其短。又選官裁病。卽嗟誚滿道。人之四體。會盈有虛。旬日之間。便至怨詈。況實有假託。不由寢頓者邪。一詣不前。貧苦交困。則兩邊致患。互不相體。校之以實。並有可哀。若職置二人。則無此弊。兼選曹樞要。歷代斯重。人經此職。便成貴塗。已心外議。咸不自限。故范曄魯爽。舉兵滅門。以此言之。實由榮厚勢驅。殷繁所至。設可擬議。此授唯有數人。本積歲月。稍加

引進。而理無前期。多生慮表。或嬰艱抱疾。事至回移。官人之任。決不可闕。一來一去。向人已周。非有黜責。已貴難賤。旣成妨長。寘之無所。盛衰遞襲。便是一段世臣相處之方。臣主生疑。所以彌覺此職宜在降階。監令端右。足處時望。無人則闕。異於九流。今但直銓選部。有減前資物情。好猜。橫立別解。本旨向意。終不外宣。唯有從耶。分置視聽。自改選旣輕。先民情已變。有堪其任。大展遷回。兼常之宜。以時稍進。本職非復重官。

讀史補集 卷八 四
可得。不須帶帖。數過。居之。盡無貽怪。自中分荆揚子時。便有意於此。正訝改革不少。容生駭惑。爾來多季。欲至歲下處分。會何偃致。故應有親人故近。因此施行本意。詔文不得委悉。故復紙墨具陳。於是置吏部尚書二人。省五兵尚書。莊及度支尚書。顧頔之。並補選職。遷右衛將軍。加給事中。時河南獻舞馬。詔羣臣爲賦。莊所上爲佳。又使莊作舞馬歌。令樂府歌之。五年。又爲侍中。領前軍將軍。于時世祖出行。夜還。敕開門。莊

居守。以蔡信或虛執不奉旨。須墨詔。乃開上後。因酒讌。從容曰。卿欲效郅君章邪。對曰。臣聞蒐巡有度。郊祀有節。盤于遊田。著之前誠。陛下今蒙犯塵露。晨往宵歸。容恐不逞之徒。妄生矯詐。臣是以伏瀆神筆。乃敢開門耳。改領遊擊將軍。又領本州大中正。晉安王子勛征虜長史。廣陵太守加冠軍將軍。改爲江夏王義恭太宰長史。將軍如故。六年。又爲吏部尚書。領國子博士。坐選公車。令張竒免官。事在顏師伯傳。時北中郎

將新安王子鸞有盛寵欲令招引才望乃使子鸞援莊爲長史府尋進號撫軍仍除長史臨淮太守未拜又除吳郡太守莊多疾不樂去京師復除前職前廢帝卽位以爲金紫光祿大夫初世祖寵姬殷貴妃薨莊爲誅云贊軌堯門引漢昭帝母趙婕妤堯母門事廢帝在東宮銜之至是遣人詰責莊曰卿昔作殷貴妃誅頗知有東宮不將誅之或說帝曰死是人之所同政復一往之苦不足爲深困莊少長富貴今且繫之尚

方使知天下苦劇然後殺之未晚也帝然其言繫於在尚方太宗定亂得出及卽位以莊爲散騎常侍光祿大夫加金章紫綬領尋陽王師頃之轉中書令常侍王師如故尋加金紫光祿大夫給親信二十人本官並如故泰始二年卒時年四十六追贈右光祿大夫常侍如故謚曰憲子所著文章四百餘首行於世長子颺晉平太守女爲順帝皇后追贈金紫光祿大夫

謝光祿集終



國家圖書館. NATIONAL CENTRAL LIBRARY, TAIWAN, R.O.C.